

दिनांक 26.09.2025

समय: 18.45 बजे

आकाशवाणी जयपुर-अजमेर

समाचार

- प्रधानमंत्री नरेन्द्र मोदी कह्यो-सरकार कानी ऊं महिलावां रा भला सारू चलायी जा रही योजनावां अर कार्यक्रमं ऊं घणो फायदो मिल्यो।
- मुख्यमंत्री भजनलाल शर्मा प्रवासी राजस्थानियां ऊं प्रदेश रा विकास मांय भागीदारी करण री अपील कीनी।
- लोकसभा अध्यक्ष ओम बिरला कानून बणावण रा काम मांय लेजिस्लेटिव ड्राफ्टिंग ने खास बतायो।
- भारतीय वायु सेना रा जांबाज लड़ाकू विमान मिग-21 ने 60 साल री सेवा पाछे आज विदाई दीरीजी।

अर

- बाड़मेर रा किराडू मांय काल मालाणी महोत्सव सुरू व्हेला।

000

प्रधानमंत्री नरेन्द्र मोदी आज वीडियो कॉन्फ्रेंस रे मार्फत बिहार मांय मुख्यमंत्री महिला रोजगार योजना री सुरूआत कीनी। श्री मोदी बिहार री 75 लाख महिलावां रा बैंक खातां मांय दस-दस हजार रुपया भेज्या। ई मौके वे कह्यो के सरकार कानी ऊं महिलावां रा भला सारू चलायी ज्यी न्यारी-न्यारी योजनावां अर कार्यक्रमं ऊं समाज रा हर तबका ने फायदो मिल्यो है। श्री मोदी कह्यो के ई योजना रो मकसद खुद रा काम-धंधा रे मार्फत महिलावां मजबूत बणावणो है।

000

प्रधानमंत्री नरेन्द्र मोदी रो देश मांय करीब 98 हजार ठोड़ां सारू बीएसएनएल रा देशी 4-जी स्टैक रो काल ओडिशा मांय उद्घाटन करण रो कार्यक्रम है। वे डिजिटल भारत निधि रे मार्फत देश मांय सौ फीसदी इंटरनेट मुहैया करावण सारू 4जी सेचुरेशन नेटवर्क री ई सुरूआत करेला। केन्द्रीय संचार मंत्री ज्यातिरादित्य सिंधिया आज नई दिल्ली मांय आ जाणकारी दीनी। वे बतायो के ई पहल ऊं 20 लाख नुवा सब्सक्राइबर डिजिटल प्रणाली ऊं जुड़ेला। इण ऊं ई-शासन, डिजिटल भुगतान, ऑनलाइन शिक्षा अर ऑनलाइन ईलाज री सेवावां ने मजबूती मिलेला।

000

मुख्यमंत्री भजनलाल शर्मा देश रा दूजा हलकां मांय रह रह्या राजस्थान रा लोगां ऊं प्रदेश रा विकास मांय भागीदारी करण री अपील कीनी है। श्री शर्मा आज हैदराबाद मांय प्रवासी राजस्थानी सम्मेलन मांय बोल रह्या हा। वे कह्यो के प्रवासी राजस्थानी पूरी दुनिया मांय राजस्थानी संस्कृति री महक फैला रह्या है। श्री शर्मा प्रवासी राजस्थानियां ने 10 दिसंबर ने जयपुर मांय राख्या जावण वाळा प्रवासी राजस्थानी दिवस जळसा मांय शामिल व्हेवण रो न्यौतो दीनो। वे राजस्थान सरकार कानी ऊं हर साल प्रवासी राजस्थानी मान देवण अर प्रवासी राजस्थानियां री कारोबारी अर सामाजिक कोशिश मांय मदद सारू खास महकमो बणावण रो ऐलाण ई कीनो। मुख्यमंत्री कह्यो के राजस्थान मांय निवेश

ने बधावो देवण सारु 20 ऊं बत्ती नुवी नीतियां बणायी ज्यी हैं, अर राजस्थान फाउंडेशन ने मजबूत बणायी ज्यो है।

मुख्यमंत्री निवेशकां ने राजस्थान मांय ऊर्जा, पर्यटन अर खनन सरीखा अपार संभावनावां वाळा हलकां मांय निवेश करण बाबत् कह्यो।

000

राज्यपाल अर विश्वविद्यालयां रा कुलाधिपति हरिभाऊ बागड़े शोध अर अनुसंधान मांय भारत री ज्ञान परंपरा ने शामिल करण बाबत् कह्यो है। श्री बागड़े आज उदयपुर मांय महाराणा प्रताप कृषि अर प्रौद्योगिकी विश्वविद्यालय रा अहलकारां अर विभागाध्यक्षां री मीटिंग मांय बोल रह्या हा। राज्यपाल विश्वविद्यालय कानी ऊं गोद लिया ज्या गांवां मांय चलाया जा रह्या कार्यक्रमों रो जायजो लीनो। मीटिंग मांय राज्यपाल कह्यो के गांवां मांय प्राइमरी स्कूलां रा बच्चां ने सीख देवण वाळा किस्सां रे मार्फत जाणकारी दे र वां री नींव मजबूत करण बाबत् काम करणो चाहिजे।

000

राजस्थान हाईकोर्ट रा सब ऊं अनुभवी जज न्यायमूर्ति संजीव प्रकाश शर्मा ने कार्यवाहक मुख्य न्यायाधीश बणायी ज्या है। विधि अर न्याय मंत्रालय ई बाबत अधिसूचना जारी कर दीनी है। अधिसूचना रे मुजब मौजूदा मुख्य न्यायाधीश न्यायमूर्ति के.आर. श्रीराम रे काल रिटायर व्ह्या पाछे जस्टिस संजीव प्रकाश शर्मा कार्यवाहक मुख्य न्यायाधीश व्हेला। न्यायाधीश शर्मा 16 नवंबर, 2016 ने वकील कोटा ऊं हाईकोर्ट रा जज बणायी ज्या हा। वे ई बगत राजस्थान हाईकोर्ट रा सब ऊं अनुभवी जज है अर राज्य विधिक सेवा प्राधिकरण रा कार्यकारी अध्यक्ष है।

000

जीएसटी बचत उत्सव रा तैत वाणिज्यिक कर विभाग री ओर ऊं सिरोही अर पाली जिलां मांय न्यारा-न्यारा कार्यक्रम राख्यी ज्या। पाली जिला रा मारवाड़ जंक्शन अर सोजत मांय डिप्टी कमिश्नर मीरा चौधरी री अगुवाई मांय महकमा रा अहलकार रैली निकाली। रैली रे मार्फत कारोबारियां अर जनता ने जी.एस.टी. री रेट मांय कमी रे कारण जरूरी सामान रा मोल मांय कमी री जाणकारी दीरीजी। सिरोही मांय राख्यी ज्या कार्यक्रम मांय जिला रा प्रभारी मंत्री के.के. विशनोई सांसद लुम्बाराम चौधरी री मौजूदगी मांय उद्यमियां ने संबोधित कीना।

केन्द्रीय संचार ब्यूरो उदयपुर री ओर ऊं चीरवा मांय जीएसटी बचत उत्सव अर केन्द्र री योजनावां रा बारा मांय प्रदर्शनी लगायी ज्यी। जैसलमेर मांय ई खाद्य व्यापार संघ अर वाणिज्यिक कर विभाग री ओर ऊं जीएसटी 2.0 रा फायदां रा बारा मांय जाणकारी दीरीजी।

000

लोकसभा अध्यक्ष ओम बिरला कह्यो है के कानून बणावण रा काम मांय इण रो मजमून बणावणो घणो खास व्हे है। वे आज चण्डीगढ़ मांय हरियाणा विधानसभा रा विधायी प्रारूप प्रशिक्षण कार्यक्रम मांय बोल रह्या हा। लोकसभा अध्यक्ष कह्यो के म्हाणा संविधान मांय विधायिका, कार्यपालिका अर न्यायपालिका री शक्तियां साफ तौर ऊं बांटी ज्यी है अर वां री मूल भावना ने ध्यान राखता थकां कानून सरल अर साफ भाषा मांय बणावणो चाहिजे।

000

प्रदेश मांय लगाया जा रह्या शहरी अर गांवाई सेवा शिविरां रा तैत अजमेर संभाग रा आयुक्त शक्ति सिंह राठौड़ आज ब्यावर रा गिब्सन हॉस्टल परिसर मांय लगायी ज्या शहरी सेवा शिविर रो दौरा कीनो। वे जनता री परेशानियां सुणी अर जन्म-मौत रा पंजीकरण, पीएम स्वनिधि योजना अर सामाजिक सुरक्षा योजनावां रा काम री जाणकारी लीनी। संभागीय आयुक्त जनता ऊं सरकारी योजनावां रो फायदो लेवण री अपील कीनी।

पाली नगर निगम मांय लगायी ज्या शहरी सेवा शिविर रो ज़िला कलेक्टर एल.एन. मंत्री दौरो कीनो अर पट्टा अर लाभान्श बांट्या। शिविर मांय लोगां री खून री जांच ई करीजी।

000

प्रधानमंत्री नरेन्द्र मोदी री जिन्दगी माथे बणायी ज्यी फिल्म “चलो जीते हैं” ऊं देखण वाळां ने सीख मिल रही है। भीलवाड़ा नगर निगम रा महापौर राकेश पाठक ई फिल्म ने सीख देवण वाळी बतायी।

000

देश री करीब 60 साल ताई सेवा कर्या पाछे भारतीय वायु सेना रा लड़ाकू जहाज मिग-21 ने आज विदाई दे दीरीजी। चंडीगढ़ एयरबेस माथे रक्षा मंत्री राजनाथ सिंह, चीफ ऑफ डिफेंस स्टाफ जनरल अनिल चौहान, वायु सेना प्रमुख एयर चीफ मार्शल ए.पी. सिंह समेत न्यारा-न्यारा नामी लोगां री मौजूदगी मांय राख्यी ज्या कार्यक्रम मांय मिग-21 ने विदाई दीरीजी। एयर चीफ मार्शल ए.पी सिंह बादल-3 नाम रा स्क्वाड्रन री आखिरी उड़ान भरी। ई मौके रक्षा मंत्री साल 1971 मांय पाकिस्तान रे खिलाफ व्ही लड़ाई मांय मिग-21 रा काम री सराहवणा करता थकां कह्यो के ऐड़ा केई मौका आया, जद मिग-21 वां रो बूतो साबित कीनो।

000

सांस्कृतिक सृजन पखवाड़ा रा तैत राजस्थान संगीत नाटक अकादमी अर बाड़मेर ज़िला प्रशासन री ओर ऊं किराडू मंदिर मांय मालाणी महोत्सव राख्यो जावेला। ई रा तैत काल अर दीतवार ने खास सांस्कृतिक संध्या राख्यी जावेला। म्हाणा खबरनवीस बतायो के ई दौरान लोक कलाकारां री ओर ऊं गायन, वादन अर नाच-गाण रा बेहतरीन कार्यक्रम पेश कर्या जावेला।

000

कोटा ज़िला रा सीमलिया थाना हलका मांय चींसा कने नेशनल हाई-वे नम्बर 27 माथे एक पिकअप गाड़ी रे ट्रैक्टर-ट्रॉली ने पिछाड़ी ऊं टक्कर मार देवण रे कारण एक टाबरी री मौत व्हे गयी और 21 जणा घणा जख्मी व्हे गया। ट्रैक्टर-ट्रॉली मांय करीब पैंतीस जणा सवार हा। जख्मी लोगां ने कोटा रा एमबीएस अस्पताल ले जायी ज्या, जटे एक जख्मी टाबरी ईलाज रे दौरान दम तोड़ दीनो।

000

सलूंबर ज़िला री सगळी स्कूलां मांय दोपहरां री छुट्टी मांय दिया जावण वाळा भोजन री गुणवत्ता तैय करण सारु अभियान चलायी ज्यो। ई रा तैत जिला स्तर रा अहलकार औचक दौरो कर र भोजन अर दूध देवण री व्यवस्था री जांच कीनी। अहलकार खुद भोजन चाख्यो अर विद्यार्थियां ऊ बातचीत कर र इण रा बारा मांय जाणकारी लीनी।

000